



**CONVENIO DE COLABORACIÓN ENTRE A CONSELLERÍA DE CULTURA,
EDUCACIÓN E ORDENACIÓN UNIVERSITARIA E AS UNIVERSIDADES DA
CORUÑA, SANTIAGO DE COMPOSTELA E VIGO NO FINANCIAMENTO
DE RECURSOS DE INFORMACIÓN CIENTÍFICA EN LIÑA.**

Santiago de Compostela, 12 de abril de 2018

COMPARECEN

(...), conselleiro de Cultura, Educación e Ordenación Universitaria (en diante CONSELLERÍA), nomeado mediante o Decreto 148/2016, do 13 de novembro (DOG núm. 217 do 14 de novembro), de acordo co disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

(...), reitor magnífico da Universidade da Coruña (en adiante UDC), en representación desta, en virtude das facultades que lle confire o artigo 20.1 da Lei orgánica 6/2001, do 21 de decembro, de universidades.

(...), reitor magnífico da Universidade de Santiago de Compostela (en adiante USC), en representación desta, en virtude das facultades que lle confire o artigo 20.1 da Lei orgánica 6/2001, do 21 de decembro, de universidades.

(...), reitor magnífico da Universidade de Vigo (en adiante UVIGO), en representación desta, en virtude das facultades que lle confire o artigo 20.1 da Lei orgánica 6/2001, do 21 de decembro, de universidades.

Interveñen en función dos seus respectivos cargos e no exercicio das facultades que teñen conferidas e

EXPOÑEN

PRIMEIRO.- Que as universidades do Sistema Universitario de Galicia (en diante SUG), son entidades de dereito público que, xunto coa misión docente, realizan actividades de investigación e desenvolvemento científico e tecnolóxico, o que as configura coma un dos principais axentes xeradores de coñecemento en Galicia.



Que as universidades do SUG teñen como un dos seus obxectivos a busca da calidade científica e a materialización da transferencia tecnolóxica a partir de resultados científicos para a mellora do sistema económico e o benestar da sociedade galega, contando para isto con infraestruturas científico-tecnolóxicas e capital humano, claves para acadar esta calidade.

A biblioteca universitaria cobra gran importancia dentro da institución. As bibliotecas universitarias son as que experimentan un maior desenvolvemento no sentido dunha maior inversión en infraestruturas e equipamento reflectido na creación de novos edificios ou na ampliación e modernización dos xa existentes.

O concepto de biblioteca evoluciona e o fai en maior medida no ámbito das bibliotecas universitarias e científicas. As bibliotecas electrónicas son, hoxe, unha realidade e permiten o movemento dos seus documentos facilmente entre os membros docentes e persoal investigador.

SEGUNDO.- A aparición das chamadas tecnoloxías da información e da comunicación, o uso xeneralizado das redes de comunicación propicia o cambio de concepto de propiedade do documento polo acceso a el, e orixina un aumento da demanda de publicacións en soporte dixital. A información en formato electrónico permite unha gran facilidade para a difusión dun volume de información a unha gran cantidade de usuarios.

Así, as adquisicións de recursos electrónicos por parte das universidades adoita realizarse a través de licenzas de acceso a coleccións completas ou partes, favorecendo a cooperación entre as bibliotecas universitarias, mellorando a eficacia grazas á unión de institucións co fin de optimizar os recursos comúns e rendibilizar as inversións.

As universidades galegas constituíron para tal fin o Consorcio de Bibliotecas Universitarias de Galicia (Bugalicia) que naceu co obxectivo fundamental de apoiar a calidade dos servizos bibliotecarios das tres universidades a través da cooperación interbibliotecaria no referido á adquisición e xestión dos recursos electrónicos de información científica, á aplicación de novas tecnoloxías da información adaptadas ós servizos bibliotecarios, ás conexións a redes nacionais e internacionais, etc.

Bugalicia é un servizo de xestión integrada da información científica que pon a disposición de grupos de investigación, persoal docente e estudantes un amplo abano de



recursos de información científica en liña, entre os que se inclúen bases de datos, revistas electrónicas, libros electrónicos, xestores bibliográficos e ferramentas de xestión, entre outros, que resultan básicos no desenvolvemento dos seus traballos científicos.

TERCEIRO.- Nestes momentos está en tramitación o convenio de colaboración entre a Xunta de Galicia e as tres Universidades do SUG para a constitución dun Consorcio Interuniversitario do Sistema Universitario de Galicia (CISUG), xunto cos seus estatutos. A sinatura deste convenio supón a integración no CISUG do Consorcio de Bibliotecas de Galicia (BUGALICIA).

Esta integración non desvirtúa as obrigas derivadas do presente convenio, xa que a colaboración da Consellería de Cultura, Educación e Ordenación Universitaria se instrumenta a través das 3 universidades, que son as que constitúen o CISUG como unha ferramenta das cuestións comúns da xestión universitaria.

CUARTO.- Que a Secretaría Xeral de Universidades, de acordo coas competencias que lle outorgou o Decreto 4/2013, do 10 de xaneiro, de estrutura orgánica da Consellería de Cultura, Educación e Ordenación Universitaria, debe velar pola promoción e xestión eficiente e integrada dos recursos e capacidades de investigación do SUG para a súa vertebración e posta en valor no marco do sistema de Innovación. Entre estas competencias atópase a promoción da coordinación das universidades galegas no establecemento de programas, infraestruturas e actuacións en materia de investigación.

Por conseguinte, as partes abaixo asinantes acordan subscribir o presente convenio, que se rexerá polas seguintes

CLÁUSULAS

PRIMEIRA.- Obxecto do convenio

O obxecto deste convenio é establecer as condicións polas que se rexerá a colaboración entre a Consellería de Cultura, Educación e Ordenación Universitaria e as universidades do SUG para o financiamento das accións que supoñen a xestión dos recursos de información necesarios para o desenvolvemento dos traballos científicos do persoal



investigador e do persoal docente das universidades do SUG por medio das bibliotecas universitarias.

Trátase de poñer a disposición dos grupos de investigación, do persoal docente e dos/as estudantes un abano de recursos de información científica en liña (bases de datos, revistas electrónicas e e-books) que resultan básicas para o desenvolvemento do traballo científico e docente.

Para tal fin, as universidades realizan unha xestión centralizada de recursos electrónicos de interese científico a través do Consorcio de Bibliotecas de Galicia que supón unha mellor posición fronte ao mercado, pois permite acadar acordos de maior envergadura dos que serían posible a nivel individual, como un só diante do editor, o que reforza a capacidade de negociación á hora de obter beneficios no trato e unha mellora orzamentaria nos acordos de adquisición de información electrónica.

SEGUNDA.- Contía da axuda

A axuda irá destinada a subvencionar parte do custo das universidades galegas dos recursos de información científica en liña (bases de datos, revistas electrónicas e e-books) e do soporte ás novas tecnoloxías nos servizos bibliotecarios universitarios, recursos accesibles tanto a persoal docente como investigador das universidades galegas.

A dotación para este convenio é de 1.525.713 € con cargo á aplicación orzamentaria 10.40.561B.744.0 e código de proxecto (2016 00129) e co seguinte reparto:

UDC	USC	UVIGO
508.571 €	508.571 €	508.571 €

Esta cantidade de 1.525.713 € trátase dun importe certo, e quedan por conta das beneficiarias a diferenza de financiamento necesario para a total execución da actividade subvencionada, debendo ser reintegrado ao financiamento público unicamente no caso e polo importe que supere o custo total e real da actividade.

A axuda é compatible con outras concedidas para o mesmo fin, pero en ningún caso, o importe da subvención achegada pola consellería poderá ser de tal contía que, illada ou en concorrencia con outras subvencións, supere o custo da actividade subvencionada, tal



como se establece no artigo 17.3º da Lei 9/2007, do 13 de xuño, de subvencións de Galicia.

TERCEIRA.- Compromiso das partes e obrigas

A Consellería de Cultura, Educación e Ordenación Universitaria comprométese a colaborar no financiamento para a adquisición centralizada de recursos electrónicos de interese científico das tres universidades.

As universidades galegas comprométese a contratar modelos comerciais de acceso cruzado que permiten que as revistas subscritas por unha biblioteca poidan ser accesibles tamén polo resto de bibliotecas asociadas, garantir o acceso perpetuo ás coleccións nucleares e a xestionar unha maior cobertura de acceso.

De conformidade co artigo 31.7 da Lei 9/2007, do 13 de xuño, de subvencións de Galicia, e de acordo co establecido no artigo 11.e) do Decreto 11/2009, do 8 de xaneiro, polo que se aproba o Regulamento da Lei 9/2007 de subvencións de Galicia, a obriga de presentar a certificación do cumprimento de obrigas coa Administración pública da comunidade autónoma, coa Administración do Estado e coa seguridade social substituirase por unha declaración responsable de estar ao día no cumprimento das obrigas tributarias ou fronte á seguridade social e de non ter pendente de pagamento ningunha outra débeda coa Administración.

As universidades públicas son definidas como administración pública no artigo 3.2 c) do texto refundido da Lei de contratos do sector público, aprobado polo Real decreto lexislativo 3/2011, do 14 de novembro, polo que son poder adxudicador e están sometidas en canto á contratación de obras e subministracións á normativa pública de contratación.

CUARTA.- Fórmula de pagamento

O pagamento, único, realizarase contra a presentación, antes do 30 de novembro de 2018, por parte da UDC, a USC e a UVIGO dunha memoria na que se dea conta do destino da achega e da certificación expedida polo órgano de control correspondente das tres universidades na que se dá toma de razón en contabilidade da achega.



Especificarase o cumprimento da finalidade do presente convenio e que os fondos foron destinados a este fin, así como o detalle da realización dos pagamentos.

Así mesmo, deberán presentar unha declaración responsable de estar ao día no cumprimento das obrigas tributarias ou fronte á seguridade social e de non ter débedas coas administracións, así como unha declaración complementaria do conxunto das axudas solicitadas, tanto as aprobadas ou concedidas como as pendentes de resolución, para este fin, das distintas administracións públicas.

QUINTA.- Responsabilidade

A subscrición do presente convenio non supón relación laboral contractual ou de calquera outro tipo entre os/as profesionais que vaian desenvolver as actividades e a consellería, de tal xeito que non se lle pode esixir responsabilidade ningunha, indirecta nin subsidiaria, polos actos ou feitos acontecidos no seu desenvolvemento.

SEXTA.- Comisión de seguimento

Para o seguimento do convenio ou coñecemento de calquera cuestión sobre a súa interpretación, modificación, resolución ou efectos deste que poidan xurdir, crearase unha comisión mixta constituída do seguinte modo:

- Tres membros da Secretaría Xeral de Universidades, dos que un actuará como presidente.
- O/a vicerreitor/a da UDC responsable destas accións ou persoa en quen delegue.
- O/a vicerreitor/a da USC responsable destas accións ou persoa en quen delegue.
- O/a vicerreitor/a da UVIGO responsable destas accións ou persoa en quen delegue.

A dita comisión actuará como órgano de vixilancia, seguimento e control do establecido neste convenio, e promoverá, se o considera conveniente, outras actuacións que poidan enriquecer o seu desenvolvemento.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das



posibles responsabilidades relativas á subvención concedida, serán resoltas pola Consellería de Cultura, Educación e Ordenación Universitaria.

O presente convenio réxese en canto a súa interpretación e desenvolvemento polo ordenamento xurídico administrativo, con expresa submisión das partes á xurisdición contencioso-administrativa, nos termos que se establece no artigo 47 e seguintes da Lei 40/2015, do 1 de outubro, de réxime xurídico do sector público.

De acordo co establecido no artigo 53 da dita lei este convenio deberá ser remitido ao Consello de Contas nos termos que no mesmo se establecen.

SÉTIMA.- Publicidade

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, as universidades do SUG consenten expresamente para que a Administración inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como ás sancións impostas. As reservas que puideran facer os peticionarios no sentido de non autorizar a obtención dos datos ou á publicidade destes nos rexistros, que en todo caso terán que expresarse, poderá dar lugar á exclusión do proceso de participación para obter a axuda ou á revogación do acto de outorgamento.

As subvencións estarán sometidas á función interventora e de control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, de subvencións de Galicia. Así mesmo, estarán sometidas ás actuacións de comprobación previstas na lexislación do Tribunal de Contas e do Consello de Contas no exercicio das súas funcións de fiscalización e control do destino das subvencións.

En aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno e de acordo co indicado na actual redacción do artigo 20 da Lei 38/2003, de 17 de novembro, xeral de subvencións, a información correspondente ao presente convenio publicárase na Base de Datos Nacional de Subvencións.

**OITAVA.- Natureza do convenio**

De acordo co establecido no artigo 36 do Decreto 11/2009, do 8 de xaneiro, do 14 de novembro, do 13 de xuño e do 8 de xaneiro polo que se aproba o Regulamento da Lei 9/2007, do 13 de xuño, de subvencións de Galicia, este convenio ten un interese público dado que é preciso dar resposta ás necesidades do persoal docente e do persoal investigador das universidades galegas de ter acceso aos contidos das publicacións científicas en soporte dixital. Esta acción esténdese ás tres universidades galegas para fomentar a xestión compartida dos contidos, acceso, distribución e almacenamento dos recursos electrónicos das novas bibliotecas dixitais, non sendo necesario promover a concorrência competitiva.

O presente convenio de colaboración ten a natureza dos previstos no artigo 4.1c) do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, rexéndose aos seus efectos pola normativa xeral en materia de contratos das administracións públicas e polo establecido na Lei 9/2007, de 13 de xuño, de subvencións de Galicia e o seu regulamento, aprobado polo Decreto 11/2009, do 8 de xaneiro.

NOVENA.- Vixencia do convenio

O presente convenio entrará en vigor na data da súa sinatura, sen prexuízo de que poida atender accións realizadas desde o 1 de xaneiro de 2018 e terá vixencia ata o 31 de decembro de 2018.

Non obstante o establecido no apartado anterior, este convenio poderá extinguirse por acordo mutuo e voluntario das partes, por desistencia dalgunha ou por denuncia deste por incumprimento dalgunha delas, o que se comunicará fidelignamente, logo de audiencia desta e con, polo menos, un mes de antelación. En calquera destes casos procederase á revogación das axudas, así coma ao reintegro total ou parcial das cantidades percibidas e a esixencia de xuros de mora nos casos previstos no artigo 33 da Lei 9/2007, do 13 de xuño, de subvencións de Galicia.



Lido por todas as partes, por si mesmas, e como proba de conformidade co expresado no presente convenio, asínano e rubrícano por quintuplicado, no mesmo lugar e data que se indica ao comezo.

O conselleiro de Cultura, Educación
e Ordenación Universitaria

O reitor da Universidade da
Coruña

O reitor da Universidade de
Santiago de Compostela

O reitor da Universidade de
Vigo